

MALAYSIA
DEWAN RAKYAT
ATURAN URUSAN MESYUARAT

NASKAH SAHIH/BAHASA MALAYSIA

<http://www.parlimen.gov.my>

HARI RABU, 15 MAC 2023, PUKUL 10.00 PAGI

Bil. 20

PERTANYAAN-PERTANYAAN BAGI JAWAB LISAN

1. PR-1521-L18217
Tuan Mohd Sany bin Hamzan [Hulu Langat] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian berhasrat memperkenalkan undang-undang yang mewajibkan potongan gaji anak-anak yang menghantar ibu bapa mereka di pusat jagaan atau rumah jagaan warga emas yang terdapat dalam negara ini.
2. PR-1521-L18659
Puan Hajah Salamiah binti Mohd Nor [Temerloh] minta **MENTERI PERTANIAN DAN KETERJAMINAN MAKANAN** menyatakan apakah usaha yang dilakukan oleh Kementerian untuk memastikan penternakan ikan air tawar menjadi salah satu sumber utama pendapatan kepada penduduk tempatan.
3. PR-1521-L19421
Puan Young Syefura binti Othman [Bentong] minta **MENTERI PENDIDIKAN** menyatakan jumlah kuarters guru yang ada dan perancangan untuk baik pulih dan selenggara kuarters guru yang uzur.
4. PR-1521-L18744
Dr. Abd Ghani bin Ahmad [Jerlun] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kerajaan bercadang mewujudkan pusat jagaan khas anak luar nikah di seluruh negeri di Malaysia dan sejauh manakah usaha-usaha yang diambil oleh Non-Government Organisation (NGO) diberi pengiktirafan dan bantuan oleh Kerajaan.

5. PR-1521-L18204
Tuan Azli bin Yusof [Shah Alam] minta **MENTERI KEWANGAN** menyatakan strategi Kementerian dalam usaha mengawal inflasi, kestabilan monetari dan kewangan yang kondusif bagi memastikan pertumbuhan ekonomi negara yang lebih positif pada tahun ini dalam keadaan ekonomi dunia yang masih belum stabil.
6. PR-1521-L19232
Tuan Mohd Syahir bin Che Sulaiman [Bachok] minta **MENTERI PERTANIAN DAN KETERJAMINAN MAKANAN** menyatakan langkah-langkah baharu yang diambil Kementerian untuk memastikan 'ketersediaan' kapasiti bekalan makanan negara memenuhi keperluan penduduk Malaysia yang semakin meningkat, melibatkan kapasiti pengeluaran tempatan, stok penimbal dan juga perdagangan.
7. PR-1521-L18572
Puan Teresa Kok Suh Sim [Seputeh] minta **MENTERI PERLADANGAN DAN KOMODITI** menyatakan perkembangan industri buluh di Malaysia dan bilangan agensi berkenaan buluh yang telah ditubuhkan oleh Kementerian untuk usaha ini. Nyatakan bilangan benih buluh yang telah dijual kepada pihak industri oleh nurseri buluh di Lahat.
8. PR-1521-L19050
Tuan Haji Wan Hassan bin Mohd Ramli [Dungun] minta **MENTERI KEWANGAN** menyatakan langkah-langkah yang telah diambil oleh Kerajaan bagi menangani masalah kegawatan ekonomi 2023 untuk meminimumkan kesan terhadap rakyat Malaysia.
9. PR-1521-L18711
Dato' Seri Dr. Wan Azizah Wan Ismail [Bandar Tun Razak] minta **MENTERI PENDIDIKAN** menyatakan langkah memastikan pendidikan berkeperluan khas dan kurang upaya, Special Educational Needs and Disabilities (SEND) diberi fokus dan sumber yang untuk membantu pelajar dalam menghadapi cabaran mendapatkan pendidikan berkualiti.
10. PR-1521-L19401
Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI PERTANIAN DAN KETERJAMINAN MAKANAN** menyatakan apakah perancangan Kerajaan bagi mengatasi masalah nelayan-nelayan zon A yang sudah lama berkerja sebagai nelayan (10 tahun) tetapi masih belum memiliki lesen nelayan 11.1 (A) daripada Jabatan Perikanan Malaysia.

11. PR-1521-L18420

Dato' Mohd Isam bin Mohd Isa [Tampin] minta **MENTERI PENDIDIKAN** menyatakan mekanisme terbaik yang perlu dilaksanakan oleh Kementerian bagi mengatasi masalah pengurusan wang Bantuan Awal Persekolahan (BAP) agar isu kecuaiian atau kecurian wang tersebut tidak berulang lagi pada masa akan datang.

12. PR-1521-L19188

Datuk Seri Dr. Ronald Kiandee [Beluran] minta **MENTERI KEWANGAN** menyatakan berapa hutang terkini Kerajaan Persekutuan dan nyatakan langkah-langkah yang sedang diambil oleh Kerajaan untuk mengurus hutang secara berkesan.

13. PR-1521-L19415

Dato' Sri Ismail Sabri bin Yaakob [Bera] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah pihak Kementerian bercadang untuk mengkaji semula syarat-syarat kelulusan pengambilan anak angkat terutamanya kepada kanak-kanak mangsa penderaan agar mereka tidak menerima menjadi mangsa penderaan kali kedua dan adakah terdapat perancangan untuk memanjangkan tempoh perlindungan di rumah kanak-kanak sebelum dipulangkan kembali kepada waris.

14. PR-1521-L18336

Tuan Haji Muhammad Islahuddin bin Abas [Mersing] minta **MENTERI PERTANIAN DAN KETERJAMINAN MAKANAN** menyatakan langkah Kerajaan bagi membantu meringankan kos sara hidup para petani dan status terkini skim bantuan kewangan kepada para petani yang terjejas hasil.

15. PR-1521-L17943

Tuan Hassan bin Abdul Karim [Pasir Gudang] minta **MENTERI PENDIDIKAN** menyatakan langkah-langkah yang telah diambil oleh Kerajaan untuk memastikan harga makanan di kantin-kantin sekolah berada di paras yang rendah dan mampu dibeli oleh murid-murid.

16. PR-1521-L18830

Tuan Wan Razali bin Wan Nor [Kuantan] minta **MENTERI KERJA RAYA** menyatakan jumlah perbelanjaan baik pulih jalan raya yang rosak bagi 10 tahun yang terakhir secara keseluruhan dan jumlah perbelanjaan baik pulih jalan raya yang rosak khusus disebabkan musim monsun (hujan) dan kesan banjir.

17. PR-1521-L18290
Dato' Seri Amirudin bin Shari [Gombak] minta **MENTERI PELANCONGAN, SENI DAN BUDAYA** menyatakan senarai kesemua inventori karya seni yang ada dalam koleksi serta simpanan Balai Seni Negara sejak pembukaannya pada 27 Ogos 1958 sehingga kini.
18. PR-1521-L19336
Dr. Radzi Jidin [Putrajaya] minta **MENTERI KEWANGAN** menyatakan sama ada Kerajaan boleh memberi jaminan bahawa GST atau cukai yang mempunyai impak sama seperti GST tidak akan diperkenalkan semula.
19. PR-1521-L18668
Puan Yeo Bee Yin [Puchong] minta **MENTERI PENDIDIKAN** menyatakan langkah- langkah Kementerian untuk mengatasi masalah kesesakan/kekurangan sekolah di kawasan-kawasan bandar yang berkembang pesat terutamanya di Lembah Klang.
20. PR-1521-L18965
Tuan Muhammad Ismi bin Mat Taib [Parit] minta **MENTERI PERTANIAN DAN KETERJAMINAN MAKANAN** menyatakan status menaiktarafkan projek Pengairan Luar Jelapang di rancangan Pengairan Jelapang Padi di daerah Perak Tengah bagi membantu menaikkan ekonomi masyarakat tempatan.
21. PR-1521-L18309
Tuan Lim Guan Eng [Bagan] minta **MENTERI PENDIDIKAN** menyatakan langkah yang akan diambil untuk memperbaiki kedudukan Malaysia dalam penilaian terkini PISA khususnya dalam perkara-perkara STEM.
22. PR-1521-L18109
Dato' Wira Dr. Ku Abd Rahman bin Ku Ismail [Kubang Pasu] minta **MENTERI KEWANGAN** menyatakan sama ada Kerajaan akan tetap melaksanakan *Global Minimum Tax Rate* (GMTR) memandangkan ia boleh menjejaskan pelaburan dalam industri pembuatan di Malaysia khususnya dari luar negara (FDI).
23. PR-1521-L18102
Dato' Sri Doris Sophia anak Brodi [Sri Aman] minta **MENTERI KEWANGAN** menyatakan :
(a) langkah-langkah mengurangkan liabiliti negara berdasarkan laporan terkini oleh Kementerian Kewangan di mana hutang negara mencecah hampir RM1.5 trilion serta menghampiri paras 80 peratus daripada Keluaran Dalam Negara Kasar (KDNK) negara; dan

- (b) adakah ianya masih dianggap berada di tahap yang tidak kritikal memandangkan kemampuan Malaysia untuk menguruskannya seperti pengiktirafan oleh agensi penarafan dunia.

24. PR-1521-L19214

Tuan Wan Ahmad Fayhsal bin Wan Ahmad Kamal [Machang] minta **MENTERI PENDIDIKAN** menyatakan status penilaian berasaskan sekolah semenjak UPSR dan PT3 dimansuhkan. Berdasarkan piawaian yang berkuat kuasa sekarang, adakah keberkesanan pengajaran dan pembelajaran serta kemenjadian murid dapat dipantau dan diukur dengan tepat, dan sekiranya perlu, intervensi dibuat pada waktu yang diperlukan.

25. PR-1521-L18065

Puan Wong Shu Qi [Kluang] minta **MENTERI PENDIDIKAN** menyatakan rancangan perpindahan serta status terkini rancangan bagi tiga buah SJK(T) di Kluang iaitu SJKT Ladang Elaeis, SJKT Ladang Mengkibol dan SJKT Ladang Bukit Benut.

26. PR-1521-L18355

Datuk Wan Saifulruddin bin Wan Jan [Tasek Gelugor] minta **MENTERI PERTANIAN DAN KETERJAMINAN MAKANAN** menyatakan mengikut kawasan Parlimen dan DUN seluruh Malaysia :

- (a) senarai penternak babi berlesen dan tidak berlesen dan anggaran kapasiti serta hasil setiap satu; dan
- (b) senarai kompaun dan tindakan undang-undang yang telah diambil. Senaraikan penternak mana yang mematuhi dan tidak mematuhi tindakan yang dikenakan serta apakah rancangan Kerajaan untuk memastikan mereka yang terkesan oleh pencemaran dari ladang-ladang tersebut mendapat pampasan, khususnya pesawah dan nelayan darat di Parlimen Tasek Gelugor.

27. PR-1521-L19443

Tuan Lim Lip Eng [Kepong] minta **MENTERI KEWANGAN** menyatakan sebab-sebab hutang negara terkini mencecah RM1.5 trilion dan jenis-jenis hutang negara secara teliti. Senaraikan negara- negara luar di mana kadar keberhutangan Malaysia paling tinggi dan apakah kedudukan fiskal negara masih kukuh dan hutang kerajaan masih terkawal.

28. PR-1521-L18970

Tuan Jamaludin bin Yahya [Pasir Salak] minta **MENTERI PENDIDIKAN** menyatakan :

- (a) adakah Kementerian menjalankan kajian semula secara menyeluruh terhadap sistem pendidikan KSSR yang dilaksanakan kini iaitu silibus subjek teras yang sangat tinggi di peringkat rendah; dan
- (b) mewujudkan semula sistem peperiksaan agar membentuk persaingan sesama pelajar untuk lebih berjaya menguasai ilmu dan cemerlang dunia akhirat .

29. PR-1521-L18273

Datuk Seri Dr. Noraini Ahmad [Parit Sulong] minta **MENTERI PENDIDIKAN** menyatakan kaedah pengambilan *one-off* guru selain daripada graduan ikhtisas pendidikan dan bagaimana calon daripada kategori ini akan dihantar menjalani latihan terlebih dahulu memandangkan pengambilan ini telah diadakan secara besar-besaran pada tahun 2021.

30. PR-1521-L19179

Tuan Mohd Nazri bin Abu Hassan [Merbok] minta **MENTERI PENDIDIKAN** menyatakan apakah hasil kajian yang diperoleh oleh Pasukan Petugas Dasar-UEC (PPD-UEC) berhubung kait dengan isu pengiktirafan terhadap Sijil Peperiksaan Bersepadu (UEC) dan adakah Kerajaan akan memberi pengiktirafan kepada sijil tersebut.

31. PR-1521-L18639

Datuk Seri Panglima Haji Mohd Shafie bin Haji Apdal [Semporna] minta **MENTERI KEWANGAN** menyatakan jumlah hutang negara terkini secara spesifik yang melibatkan hutang dalam negeri (MGS, MGII, SPK, Bil Perbendaharaan) dan pinjaman luar pesisir (pinjaman pasaran, pinjaman projek) dan hutang luar.

32. PR-1521-L19246

Tuan Roslan bin Hashim [Kulim Bandar Baharu] minta **MENTERI PERTANIAN DAN KETERJAMINAN MAKANAN** menyatakan berhubung pembayaran 50 juta yang perlu dibayar oleh Tan Sri Syed Al Bukhari kepada pesawah mengenai pulangan yg harus diberikan oleh beliau yang juga pemegang syer dalam BERNAS. Apakah hanya beliau sahaja yang perlu untuk membayar kepada pesawah sedangkan terdapat juga syarikat-syarikat pengilang padi lain yang turut juga membeli padi daripada pesawah.

33. PR-1521-L18188

Tuan Oscar Ling Chai Yew [Sibu] minta **MENTERI KERJA RAYA** menyatakan sama ada Kementerian akan menaik taraf jalan dari Lapangan Terbang Sibu ke pusat bandar Sibu untuk mengelakkan kemalangan kerap berlaku akibat keadaan jalan tersebut yang tidak memuaskan.

34. PR-1521-L19090

Tuan Shaharizukirnain bin Abd. Kadir [Setiu] minta **MENTERI KEWANGAN** menyatakan :

- (a) berapa jumlah hutang Kerajaan Negeri Terengganu kepada Kerajaan Persekutuan setakat ini; dan
- (b) nyatakan berapa hutang yang telah dibayar oleh Kerajaan negeri sebaik sahaja diperintah oleh PAS selepas PRU14 sehingga kini.

35. PR-1521-L18344

Puan Vivian Wong Shir Yee [Sandakan] minta **MENTERI PERTANIAN DAN KETERJAMINAN MAKANAN** menyatakan sama ada pihak Kementerian telah memasukkan perancangan bagi pembinaan kompleks dan jeti pendaratan ikan Lembaga Kemajuan Ikan Malaysia (LKIM) di Sandakan, di bawah RMK-12 bagi memudahkan lagi pembangunan industri makanan laut untuk pasaran tempatan dan eksport di Sandakan.

36. PR-1521-L19314

Tuan Zakri bin Hassan [Kangar] minta **MENTERI PENDIDIKAN** menyatakan bilakah Kementerian Pendidikan akan mengubah sukatan pelajaran terutamanya sukatan pelajaran tingkatan 6 kerana ia sudah lama tidak disemak dan kurang relevan dengan keperluan masa kini.

37. PR-1521-L18527

Dato Henry Sum Agong [Lawas] minta **MENTERI PENDIDIKAN** menyatakan berapa peratusan sekolah daif di Sarawak telah dan sedang diperbaiki dan bilakah kesemua sekolah daif dapat dipulihkan.

38. PR-1521-L18573

Dr. Hajah Halimah Ali [Kapar] minta **MENTERI PENDIDIKAN** menyatakan bilakah Kementerian akan membina sekolah kebangsaan baharu untuk mengatasi masalah SK Rantau Panjang, Klang yang sudah terlalu padat.

39. PR-1521-L18239

Tuan Haji Yusuf bin Abd. Wahab [Tanjong Manis] minta **MENTERI PERTANIAN DAN KETERJAMINAN MAKANAN** menyatakan bantuan-bantuan kepada pekebun dan petani berikutan kenaikan harga benih, racun rumpai dan baja di negara kita. Bagaimanakah untuk memastikan bantuan itu dapat disalurkan supaya sampai terus kepada pekebun dan petani di Parlimen Tanjong Manis.

40. PR-1521-L18871

Tuan Nurul Amin bin Hamid [Padang Terap] minta **MENTERI PERTANIAN DAN KETERJAMINAN MAKANAN** menyatakan apakah langkah yang diambil oleh Kementerian untuk membantu para petani, peternak dan nelayan yang mengalami kerugian akibat banjir Monsun Timur Laut di Kelantan dan Terengganu.

41. PR-1521-L18546

Tuan Haji Ahmad Johnie bin Zawawi [Igan] minta **MENTERI PENDIDIKAN** menyatakan sejauh manakah pengambilan guru khas *one-off* seramai 18,702 orang telah dilaksanakan. Berapa jumlah lantikan guru dari Sarawak, sama ada secara lantikan tetap atau secara perkhidmatan kontrak (*Contract of Service*) yang diisi oleh calon-calon guru dari Sarawak bagi mengisi kekosongan guru yang kritikal di Sarawak.

42. PR-1521-L18161

Dato' Azman bin Nasrudin [Padang Serai] minta **MENTERI PERTANIAN DAN KETERJAMINAN MAKANAN** menyatakan apakah langkah-langkah Kementerian dalam membantu para petani dan penternak serta apakah langkah-langkah jangka pendek, jangka sederhana dan jangka panjang Kementerian untuk menangani isu harga makanan ternakan ayam dan ternakan ruminan serta harga racun dan baja semakin meningkat.

43. PR-1521-L18608

Tuan Chow Yu Hui [Raub] minta **MENTERI PERTANIAN DAN KETERJAMINAN MAKANAN** menyatakan sama ada Kementerian bersedia untuk menubuhkan Lembaga Durian Malaysia bagi memaju serta memodenkan industri durian dalam aspek seperti pengeluaran, pengeksportan, pemprosesan, pembuatan dan pemasaran durian serta produk durian.

44. PR-1521-L18062

Dato' Sri Ikmal Hisham bin Abdul Aziz [Tanah Merah] minta **MENTERI PENDIDIKAN** menyatakan apakah perancangan masa hadapan Kementerian untuk mengoptimumkan kemudahan pusat latihan Institut Pendidikan Guru (IPG) di seluruh negara yang ketika ini tidak digunakan sepenuhnya dan boleh merugikan perbelanjaan wang awam terutama dalam menampung kos kerja-kerja penyelenggaraan berterusan bangunan IPG dan juga perbelanjaan sumber manusia yang ditempatkan di IPG seluruh negara.

45. PR-1521-L18315

Puan Isnaraissah Munirah Majilis [Kota Belud] minta **MENTERI KEWANGAN** menyatakan adakah warta P.U.(A) 119, Perintah Perlembagaan Persekutuan (Kajian Semula Pemberian Khas di Bawah Perkara 112D) (Negeri Sabah) 2022 telah dibatalkan dan apakah formula yang diguna pakai dalam menentukan jumlah baharu RM260 juta seperti yang diumumkan baru-baru ini.

46. PR-1521-L19309

Tan Sri Dato' Haji Mahiaddin bin Haji Mohd. Yassin [Pagoh] minta **MENTERI KEWANGAN** menyatakan :

- (a) adakah Kerajaan akan melaksanakan subsidi bersasar bagi mengurangkan beban fiskal negara; dan
- (b) mekanisme pelaksanaan subsidi bersasar tersebut.

47. PR-1521-L18649

Puan Rodiyah binti Sapiee [Batang Sadong] minta **MENTERI KERJA RAYA** menyatakan apakah penguatkuasaan yang dilaksanakan oleh Kementerian untuk mengelakkan isu keselamatan di tapak pembinaan tidak diperkecilkan dan terma-terma keselamatan di tapak pembinaan sentiasa dipatuhi.

48. PR-1521-L18988

Tuan Sabri bin Azit [Jerai] minta **MENTERI PENDIDIKAN** menyatakan adakah penghapusan soalan tulisan Jawi di peringkat Sijil Pelajaran Malaysia (SPM) bersifat kekal.

49. PR-1521-L18276

Tuan Manndzri bin Nasib [Tenggara] minta **MENTERI PERTANIAN DAN KETERJAMINAN MAKANAN** menyatakan tindakan yang diambil oleh Kerajaan bagi memastikan graduan program Latihan Kemahiran Pertanian Kebangsaan dapat terus kekal berada dalam industri pertanian dan bukan hanya setakat separuh jalan sahaja.

50. PR-1521-L18856
Dr. Ahmad Fakhruddin bin Fakhruddin [Kuala Kedah] minta **MENTERI PENDIDIKAN** menyatakan mekanisme penempatan guru di sekolah-sekolah mengikut bidang kepakaran dan kemahiran terutamanya guru yang berpindah.
51. PR-1521-L18725
Dato' Muhammad Bakhtiar bin Wan Chik [Balik Pulau] minta **MENTERI PEMBANGUNAN WANITA, KELUARGA DAN MASYARAKAT** menyatakan laporan daripada sokongan pendidikan dan latihan formal juga tidak formal yang telah dijalankan buat wanita terutama buat ibu tunggal di dalam negara.
52. PR-1521-L19073
Tuan Haji Mohd Misbahul Munir bin Masduki [Parit Buntar] minta **MENTERI PERTANIAN DAN KETERJAMINAN MAKANAN** menyatakan apakah alternatif yang boleh dicadangkan untuk kepentingan para pesawah terutama di daerah Kerian berkaitan penyelenggaraan infra sistem pengairan dan saliran di bawah IADA yang peruntukannya dikurangkan.
53. PR-1521-L18475
Puan Rodziah binti Ismail [Ampang] minta **MENTERI KERJA RAYA** menyatakan iltizam menangani kekerapan tanah runtuh yang mengakibatkan kemusnahan dan kehilangan nyawa dengan menyahut saranan saya menubuhkan Majlis Pengurusan Cerun Negara rentas Kementerian, agensi dan jabatan Kerajaan namun berpaksikan Pelan Induk Cerun Negara agar rakyat berasa selamat di persekitaran mereka.
54. PR-1521-L18910
Dato' Sri Tuan Ibrahim bin Tuan Man [Kubang Kerian] minta **MENTERI KEWANGAN** menyatakan :
(a) perincian jumlah kos pembinaan MRT3 terkini; dan
(b) senarai syarikat-syarikat Bumiputera dan syarikat-syarikat asing yang terlibat di dalam projek MRT3.
55. PR-1521-L18916
Tuan Zulkifli bin Ismail [Jasin] minta **MENTERI PENDIDIKAN** menyatakan apakah perancangan terkini Kementerian terhadap Kurikulum Bersepadu Dini (KBD) kepada sekolah harian kebangsaan.

56. PR-1521-L18926

Dato' Hajah Siti Zailah binti Mohd Yusoff [Rantau Panjang] minta **MENTERI PEMBANGUNAN WANITA, KELUARGA DAN MASYARAKAT** menyatakan status pelaksanaan segala keputusan yang pernah diputuskan di dalam Majlis Sosial Negara sama ada akan diteruskan atau sebaliknya.

ATURAN URUSAN MESYUARAT DAN USUL-USUL

1. **Menyambung semula pertimbangan ke atas Rang Undang-undang Perbekalan 2023 (D.R.2/2023) dan Usul Anggaran Perbelanjaan Pembangunan 2023 seperti berikut :**

“Bahawa Dewan ini, menurut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa suatu jumlah wang sebanyak tidak lebih dari sembilan puluh sembilan bilion ringgit (RM99,000,000,000) dibelanjakan daripada Kumpulan Wang Pembangunan bagi tahun 2023, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2023, yang dibentangkan sebagai Kertas Perintah 19 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut, dan bahawa Usul yang telah diluluskan oleh Dewan ini pada 20 Disember 2022 mengenai perbelanjaan yang dibelanjakan daripada Kumpulan Wang Pembangunan bagi tahun kewangan 2023 adalah dibatalkan dan hendaklah disahkan.”

Dalam Jawatankuasa Sebuah-buah Majlis (14 Mac 2023)

- | | | | |
|----|----------------|--|-----------------------------------|
| 2. | (D.R 4/2023) | Rang Undang-Undang Kewangan 2023

[Menteri Kewangan] | Bacaan Kali
Yang Kedua |
| 3. | (D.R 3/2023) | Rang Undang-Undang Levi Keuntungan Luar Biasa (Pengesahan) 2023

[Menteri Kewangan] | “ |
| 4. | (D.R 1/2023) | Rang Undang-Undang Pencetakan Teks Al-Qur'an (Pindaan) 2023.

[Menteri Dalam Negeri] | “ |

5. **Menteri Kewangan akan mencadangkan :**

“Bahawa Dewan ini, mengikut peruntukan perenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan) membuat pelaburan dengan menukar baki pinjaman Kerajaan Malaysia sebanyak RM165,282,814.00 kepada UDA Holding Berhad (UDA), sebuah syarikat dimiliki sepenuhnya oleh Menteri Kewangan (Diperbadankan) kepada ekuti (modal saham) bersamaan Seratus Enam Puluh Lima Juta Dua Ratus Lapan Puluh Dua Ribu Lapan Ratus Empat Belas (165,282,814) unit saham biasa pada nilai RM1 bagi satu unit saham.”

6. PR-1521-U(27)231

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia - Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia - Thailand adalah sepanjang kira-kira 656 km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak Kerajaan memandang serius perkara ini dengan menyegerakan pembangunan tembok sempadan Malaysia - Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia - Thailand agar benar-benar berkesan menjamin keselamatan perbatasan negara."

[Menteri Dalam Negeri]

7. PR-1521-U(27)232

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan bahan makanan mentah seperti ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan bahan mentah tempatan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bahan makanan mentah. Kerajaan tidak seharusnya melepaskan tanggungjawab menjaga keterjaminan bekalan bahan mentah makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

8. PR-1521-U(27)233

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018 - 2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Menteri Pembangunan Kerajaan Tempatan]

9. PR-1521-U(27)234

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan kepada enam negeri kurang membangun, iaitu Kedah, Kelantan, Perlis, Sabah, Sarawak dan Terengganu seperti yang direncanakan di dalam Pelan Rancangan Malaysia Ke-12 (RMK-12) dapat dilaksanakan secepat mungkin. Berdasarkan pelan RMK-12 tersebut, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Ini akan mempercepatkan penyediaan infrastruktur dan kemudahan asas serta menjana lebih banyak peluang ekonomi di negeri kurang membangun dan mengurangkan jurang pembangunan."

[Menteri Ekonomi]

10. PR-1521-U(27)235

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat bencana alam seperti banjir dan musim tengkujuh. Kerosakan tanaman dan kematian ternakan sering kali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

11. PR-1521-U(27)236

Dato' Seri Dr. Shahidan bin Kasim [Arau] akan mencadangkan :

Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Perdana Menteri]

12. PR-1521-U(27)237

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

13. PR-1521-U(27)238

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyemak semula garis panduan Suruhanjaya Komunikasi Multimedia Malaysia (SKMM) mengenai isi kandungan media sosial yang sensitif serta tidak sesuai dengan agama Islam dan budaya tempatan seperti kandungan yang *pro-LGBT* dan *pro-liberalisme*. Misalnya, SKMM baru-baru ini telah bekerjasama dengan Polis Diraja Malaysia (PDRM) untuk memantau penyebaran klip-klip video sensitif yang berbaur provokasi dengan niat mencetuskan ketidakharmonian, kebencian dan prejudis. Oleh hal demikian, Kerajaan digesa supaya melakukan tindakan yang sama bagi menangani penularan isi kandungan *pro-LGBT* dan *pro-liberalisme* di media sosial. Tindakan ini adalah penting untuk memastikan martabat Islam sebagai agama rasmi negara terpelihara dan budaya tempatan dihormati. "

[Menteri Komunikasi dan Digital]

14. PR-1521-U(27)239

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

15. PR-1521-U(27)240

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan mencukupi serta membolehkan penyelidikan yang agresif dibuat bagi menghasilkan benih padi baru. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia, Filipina dan Myanmar yang mempunyai tanaman dan baka padi yang berdaya komersial tinggi."

[Menteri Pertanian dan Keterjaminan Makanan]

16. PR-1521-U(27)241

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyediakan pelan tindakan yang komprehensif untuk menangani kadar pengangguran semasa yang dijangka meningkat terutamanya di kalangan graduan universiti, penduduk luar bandar dan golongan miskin bandar. Pelan tindakan ini amat diperlukan memandangkan keadaan ekonomi global juga bakal meruncing pada tahun 2023 dan kadar pelaburan asing di Malaysia akan terjejas. Dengan situasi ekonomi terkini, lambakan penganggur akan menyebabkan peningkatan jumlah golongan B40 dan B20 akibat peningkatan kos sara hidup."

[Perdana Menteri]

17. PR-1521-U(27)242

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya meneruskan usaha untuk memberi bantuan semula kepada pesawah menerusi Bajet 2023. Dalam ucapan Bajet 2023 yang lepas, Kerajaan mengumumkan bantuan sebanyak RM200 sebulan bagi tempoh tiga bulan kepada 240 ribu penerima yang layak. Anggaran keseluruhan perbelanjaan bantuan tersebut adalah lebih kurang RM228 juta. Justeru itu, Kerajaan digesa agar mempercepat saluran bantuan tersebut kepada pesawah yang memerlukan bagi menyokong pengorbanan mereka sebagai tonggak utama dalam menghasilkan makanan ruji utama rakyat Malaysia iaitu beras. Kebanyakan petani di utara Semenanjung Malaysia mempunyai kawasan sawah padi yang luas serta subur yang juga sesuai ditanam pelbagai jenis tanaman seperti kelapa sawit. Walau bagaimanapun, para pesawah ini masih meneruskan tanaman padi bagi menjamin kelangsungan makanan ruji utama negara. Oleh hal demikian, Kerajaan diharapkan dapat menghargai pengorbanan para pesawah ini."

[Menteri Pertanian dan Keterjaminan Makanan]

18. PR-1521-U(27)243

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

19. PR-1521-U(27)244

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh hal yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

20. PR-1521-U(27)245

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan.

Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidak langsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

21. PR-1521-U(27)225

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap Akta Suruhanjaya Pelantikan Kehakiman (JAC) 2009, seiring dengan cadangan serta titah Majlis Raja – Raja Melayu, demi memastikan pelantikan lima daripada sembilan ahli JAC tidak lagi dilakukan oleh Perdana Menteri. Bergerak ke hadapan, adalah wajar untuk Kerajaan Perpaduan meminda Akta JAC 2009 dan Perkara 122B Perlembagaan Persekutuan bagi menghentikan campur tangan eksekutif yang hanya mengikut selera politik semata-mata dalam isu pelantikan hakim, sekali gus dapat mewujudkan kebebasan sistem kehakiman serta menjunjung keluhuran perlembagaan dan kedaulatan undang-undang di dalam Malaysia sepertimana yang terkandung dalam Rukun Negara.

Sebelum ini, negara telah dikejutkan dengan pendedahan oleh mantan Tan Sri Peguam Negara di dalam buku tulisannya yang berjudul, "*My Story: Justice in Wilderness*", yang nyata bertentangan dengan laungan Kedaulatan Undang-undang atau "*Rule of Law*", oleh Kerajaan pimpinan Yang Amat Berhormat Perdana Menteri ke-7. Berdasarkan penulisan beliau, terdapat pelbagai dakwaan mengenai isu pelantikan hakim, campur tangan didalam sistem kehakiman, pendakwaan politik, serta pelbagai pendedahan yang menerbitkan seribu satu persoalan. Pendedahan daripada mantan Tan Sri Peguam Negara tersebut amat membimbangkan, menimbulkan rasa syak wasangka dan persoalan terhadap sistem keadilan, dan juga kepincangan atas doktrin, dengan izin, "*separation of power*" atau pengasingan kuasa di dalam negara kita.

Justeru, saya menyambut baik kenyataan YB Menteri di Jabatan Perdana Menteri (Undang-Undang dan Reformasi Institusi) yang menyatakan bahawa, Jemaah Menteri telah bersetuju dengan cadangan untuk menubuhkan Suruhanjaya Siasatan Diraja (RCI) untuk meneliti mengenai perkara tersebut. Namun, saya fikirkan Kerajaan tidak sepatutnya sekadar berhenti di situ sahaja. Sebaliknya perlu meminda JAC 2009 bagi merealisasikan hasrat murni Kerajaan terutamanya dalam urus tadbir yang baik atau '*good governance*'."

[Perdana Menteri]

22. PR-1521-U(27)226

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap harga maksimum telur ayam yang berkuat kuasa pada 12 Oktober 2022 di bawah Akta Kawalan Harga dan Anti Pencatutan 2011 dengan menaikkan harga kawalan telur tempatan dari RM0.41 ke RM0.50 sebiji, iaitu pada paras harga yang sama dengan harga telur import dari India. Di samping itu, Kementerian juga boleh mewujudkan "elaun telur secara *top-up*" kepada golongan B40 dengan menampung selisih harga telur sebanyak RM0.09 (RM0.41 -RM0.50) sebiji. Langkah ini boleh meringankan bebanan kewangan keluarga B40 dan turut membantu penternak tempatan mengatasi masalah kos operasi yang meningkat, sekali gus mengatasi masalah kekurangan bekalan telur ayam. Seandainya elaun telur sebanyak RM200 setahun diberikan kepada golongan B40, banyak telur yang boleh dimakan oleh keluarga B40.

Kementerian seharusnya mengutamakan penternak tempatan semasa menangani masalah kekurangan bekalan telur ayam. Ramai penternak atau pengusaha ladang ayam telur terpaksa menampung kos operasi yang tinggi mengeluarkan telur. Kos untuk menghasilkan sebiji telur ayam di ladang kini mencecah RM0.45 sebiji, di mana sebahagian besarnya membabitkan penghasilan makanan ayam. Menurut Laporan Kajian Khas Kos Pengeluaran Ayam Dan Telur oleh Jabatan Perangkaan Malaysia pada Disember 2022, purata kos pengeluaran di peringkat ladang bagi telur adalah RM0.48 sebiji pada September 2022. Penternak tempatan rugi kerana telur tempatan hanya boleh dijual dengan RM0.41 sebiji kerana ada kawalan harga, sedangkan kos menghasilkan sebiji telur telah pun melebihi paras harga tersebut. Kalau rugi, penternak tidak akan membela ayam untuk menghasilkan telur.

Malahan, telur import dari India dijual dengan RM0.50 sebiji, jika Kementerian memansuhkan kawalan harga, harga jualan telur tempatan juga lebih kurang sama iaitu kira-kira RM0.50 sebiji. Maka, cadangan untuk meminda harga kawalan telur tempatan ke RM0.50 sebiji bakal membantu rakyat dan penternak tempatan. Langkah tersebut boleh menjana ekonomi domestik dari sudut penyediaan peluang pekerjaan dan pembayaran cukai dari pihak penternak, kebersihan dan keselamatan telur ayam, kemudahan logistik, penyeliaan dan pembekalan berbanding dengan langkah mengimport telur dari India.

Justeru, Kementerian wajar mempertimbangkan cadangan pindaan kawalan harga telur supaya rakyat dan penternak tempatan tidak lagi terjejas dalam masalah kekurangan bekalan telur yang berpanjangan ini. Elaun telur kepada golongan B40 juga boleh memastikan rakyat terus berkemampuan menikmati makanan asas ini tanpa terjejas oleh kenaikan harga kawalan telur. Telur dan ayam adalah makanan asas rakyat tanpa mengira kaum atau agama, perkara ini harus dijadikan keutamaan."

[Menteri Pertanian dan Keterjaminan Makanan]

23. PR-1521-U(27)227

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan langkah-langkah Kerajaan dalam menghadapi Kemelesetan Ekonomi Global pada 2023 seperti yang diramalkan oleh pelbagai institusi kewangan dalam dan luar negara.

Menurut kajian yang dibuat oleh Bank Dunia; dalam menghadapi risiko, di mana bank-bank negara di seluruh dunia telah dan akan secara serentak menaikkan kadar faedah secara mendadak. Kesannya, seluruh dunia akan menghadapi krisis ekonomi dan bakal menuju kepada krisis kewangan yang semestinya akan memberikan impak negatif yang berpanjangan.

Pelbagai kajian dasar, pakej rangsangan dan langkah diplomatik perlu dibuat oleh Kerajaan untuk memastikan negara kita kalis krisis ini dan membolehkan rakyat hidup dalam kestabilan ekonomi yang optimum. Selain itu, krisis ekonomi secara global juga dijangka akan membawa kepada kemerosotan KDNK sebanyak 0.5 peratus pada 2023.

Pertumbuhan ekonomi mesti dipertingkatkan supaya negara kita boleh mencapai penukuhan nilai mata wang dan menarik lebih banyak pelaburan yang strategik di mana akan menyumbang kepada peluang pekerjaan, peningkatan produktiviti, pengukuhan pasaran modal dan mengurangkan kemiskinan rakyat. "

[Menteri Ekonomi]

24. PR-1521-U(27)228

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan Kerajaan untuk mewujudkan sebuah jawatankuasa khas di peringkat jemaah menteri bagi membuat kajian dan perancangan dalam membasmi kemiskinan golongan nelayan. Mengikut rekod lalu yang dibuat, bancian daripada SENDI-LKIM (2008-2017) mendapati bahawa para nelayan hanya memperoleh pendapatan melebihi RM1,200 sahaja. Meskipun Kerajaan sudah menyediakan peruntukan kepada nelayan melalui Elaun Sara Hidup Bantuan Nelayan dan Skim Subsidi Petrol, namun dengan peningkatan kos sara hidup dan keterbatasan akses kepada kemudahan yang disediakan oleh Kerajaan telah menyukarkan dan membebankan para nelayan yang berada di kawasan luar bandar. Tahun 2022, sejumlah RM7 juta diperuntukkan kepada LKIM sebagai modal pusingan pembelian ikan tempatan sebanyak 1,000 tan metrik yang akan ditempatkan di 130 bilik sejuk beku di seluruh negara untuk menghadapi musim tengkujuh. Permasalahan ini berlaku disebabkan penglibatan orang tengah yang menganiaya dan mengambil kesempatan atas usaha para

nelayan dengan memberi alasan hasil yang berkurangan disebabkan oleh cuaca buruk dan secara tidak langsung memberikan kesan negatif kepada rantai sekuriti makanan negara. Penerangan yang jelas kepada sistem penyaluran bantuan Kerajaan juga harus ditambah baik terutamanya kepada golongan-golongan yang tidak mahir menggunakan kemudahan internet dan agensi berkaitan haruslah mencari nelayan yang masih belum berdaftar agar bantuan Kerajaan juga boleh dinikmati oleh mereka. Pokoknya, Kerajaan harus meneliti dan menggali dengan lebih mendalam tentang permasalahan yang dihadapi oleh para nelayan. Kita harus memperkasakan saluran bantuan Kerajaan agar tidak berlaku ketirisan dan aktiviti penyalahgunaan kuasa yang digunakan oleh pihak-pihak tertentu. "

[Menteri Pertanian dan Keterjaminan Makanan]

25. PR-1521-U(27)229

Dato' Indera Mohd Shahr bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah pelan tindakan khas untuk menghadapi dan mengatasi krisis utiliti terutamanya tenaga elektrik dan bekalan air bersih serta apakah jangkaan kesan kepada rakyat apabila inisiatif Kerajaan mengurangkan pemberian subsidi utiliti.

Krisis tenaga elektrik berpunca dari harga bahan api sangat tinggi yang menyebabkan peningkatan mendadak kos penjanaan elektrik dan pelarasan tarif elektrik melalui mekanisme ICPT. Berdasarkan kepada kos penjanaan yang sangat tinggi ini, semua pengguna elektrik di Semenanjung Malaysia sepatutnya dikenakan surcay sebanyak 27 sen/kWj bagi tempoh 1 Januari hingga 30 Jun 2023 yang akan menyebabkan peningkatan kos sara hidup sekiranya dilepaskan kepada pengguna sepenuhnya. Sekiranya keseluruhan kos ICPT ditampung melalui subsidi, Kerajaan pula perlu menyediakan peruntukan yang sangat besar dan membebankan.

Krisis sumber air bersih diakibatkan oleh penebangan hutan secara berleluasa dan pembalakan yang tidak terkawal boleh memusnahkan "hutan awan" (*cloud forest*) yang akan mengakibatkan kehilangan sumber air yang berharga selain menyebabkan hakisan tanah dan menjejaskan kualiti sumber air. Pembuangan sampah dan sisa toksik industri juga menyumbang kepada pencemaran air sungai yang boleh menyebabkan masalah gangguan bekalan air tidak berjadual timbul dan menyukarkan rakyat dalam kehidupan seharian dan secara langsung menelan kos yang tinggi bagi meningkatkan tahap capaian bekalan air bersih, tambahan pula kerja-kerja penyelenggaraan dan penggantian peralatan secara berkala di loji rawatan air atau sistem agihan oleh operator bekalan air semestinya memerlukan perbelanjaan yang tinggi.

Oleh hal demikian jaminan tenaga dan air perlu dirangka dengan langkah yang selamat oleh Kerajaan dalam mencapai penggunaan utiliti yang mampan serta efisien dengan penggunaan kos yang rendah serta pengenaan caj tidak membebankan rakyat. Pengalaman krisis tenaga yang dilalui oleh masyarakat di Eropah perlu diambil sebagai panduan dan perkara yang perlu dirujuk dalam membuat sebarang pertimbangan pada masa kini dan hadapan."

[Menteri Sumber Asli, Alam Sekitar dan Perubahan Iklim]

26. PR-1521-U(27)230

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan menubuhkan sebuah Institut Rukun Negara bagi mengkaji dan membentangkan perancangan model literasi perpaduan jangka masa panjang menyeluruh yang akan menyelesaikan masalah polarisasi kaum yang semakin menebal dalam kalangan anak muda di negara ini. Model pendidikan jangka masa panjang ini perlu merangkumi keseluruhan aspek pembelajaran termasuk komponen subjek akademik, komponen kerohanian dan komponen etnik tanpa membelakangi peruntukkan yang terkandung dalam Perlembagaan Persekutuan dan semangat Rukun Negara. Masalah polarisasi kaum akan dilihat semakin serius jika perancangan, penekanan dan pemantauan ini tidak dilakukan segera daripada peringkat awal pembelajaran dan ia tidak dapat mencapai tahap toleransi semua kaum dan semangat kenegaraan semakin lemah dalam kalangan anak muda. Kesannya terhadap potensi untuk membangunkan negara bangsa mengikut acuan kita sendiri akan terencat dan keharmonian serta kesejahteraan negara juga akan terancam."

[Menteri Perpaduan Negara]

****UCAPAN-UCAPAN
(PERATURAN MESYUARAT 17)
(KAMAR KHAS)**

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 15.03.2023 (Rabu)	1. YB Tuan Lee Chean Chung (Petaling Jaya)	1. Kesesakan Lalu Lintas yang Kritikal di Persekitaran Lebuhraya Persekutuan	1. YB Menteri Kerja Raya
2. 15.03.2023 (Rabu)	2. YB Tuan Lee Chean Chung (Petaling Jaya)	2. ' <i>First And Last Mile Connectivity</i> ' dan Status Terkini MRT 3 untuk Pengguna Pengangkutan Awam di Petaling Jaya	2. YB Menteri Pengangkutan
3. 15.03.2023 (Rabu)	3. YB Tuan Tan Kar Hing (Gopeng)	3. Cadangan Menaik Taraf Lapangan Terbang Sultan Azlan Shah Ipoh	3. YB Menteri Pengangkutan
4. 15.03.2023 (Rabu)	4. YB Tuan Tan Kar Hing (Gopeng)	4. Isu Ketidacukupan Ambulans	4. YB Menteri Kesihatan

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**